

太平經卷之六十八同卷六十九

傳五

戒六子訣第一百四

吾將去有期戒六子一言夫道迺洞無上無下無表無裏守其和氣名為神子近求則大得遠求則失矣故古君王善為政者以腹中始起真能用道治自得矣動不失其法度數萬物自理近在習心散滿四海古者聖人名為要道治樂欲無事慎無失此此以繩正賢者今重丁寧以曉子子六人連日間吾書道雖分別異趣當共一事然舌能六極周王道備解說萬物各有異意天地得以大安君王得以無事吾書乃知神心洞六極八方自降而來伏皆懷善心無惡意其要結近居內比若萬物心在裏枝居外夫內興盛則其外興內衰則其外衰故古者皇道帝王聖人欲正洞極六遠八方反先正內以內正外萬萬相應億億不脫也以外正內者萬失之也故古者大聖教人深思遠慮閉其九戶休其四使使其渾沌比若環無端如胞中之子而無職事也迺能得其理吾之道悉以是為大要故

還使務各守其根也夫天將生人悉以真道付之物具故在師開之導之學之則可使無不知也不聞其門戶雖受天真道無一知也此若嬰兒生投一室中不導學以事無可知也所以人異者但八方異俗故其知學不同也若能一人學周流表裏盡知之矣吾將遠去有所之當復有可授不可得常安坐守諸弟子也六人自詳讀吾書從上到下為有結不解子意者考源古文以明之上行者玄真知之下行者順真知之東者初真知之南者太真知之西者少真知之北者幽真知之夫道迺大同小異故能分別陰陽而無極化為萬一千五百二十字中和萬物小備未能究天地陰陽絕洞無表裏也故但考其無舉其網見其始使可儀而記古記今其要亂自同神聖所記猶重規合矩雖相去億億萬年比若相對而語也故可為天地常經為陰陽作神道勿怪吾書前後甚復重也所以復重者恐有失之也又天道至嚴既言不敢不具通不道名為道為過劇吾誠哀之此雖

復重比若上古聖人中古聖人下古聖人皆異世而生其辭相因復重而說更以相考明迺天道悉可知此之謂也行矣吾有急行重慎持天寶傳付其人

右戒六弟子

太平經卷之六十八